

20 JUL 2000

Komuniti-Siber

PUSAT PENDIDIKAN KOMUNITI YANG PERTAMA DIRASMI OGOS DEPAN

JITRA, 20 Julai (Bernama) -- Pusat Pendidikan Komuniti anggota Parlimen Kubang Pasu yang diilhamkan oleh isteri Perdana Menteri Datin Seri Dr Siti Hasmah Mohd Ali akan beroperasi pada awal Ogos.

Pusat itu yang akan menjadi pusat siber dan kaunseling utama bagi masyarakat Kubang Pasu dibina melalui peruntukan anggota parlimen Kubang Pasu Datuk Seri Dr. Mahathir Mohammad yang juga Perdana Menteri.

Dr Siti Hasmah dijangka merasmikan pusat itu yang dikendalikan oleh Kelab Penggerak Masyarakat pada Ogos ini.

Beliau yang menghadiri perasmian konvensyen UMNO Kedah yang dirasmikan Dr Mahathir pagi ini mengambil kesempatan meninjau pelaksanaan pengubahsuaian bangunan pusat itu dan mendengar taklimat daripada pengerusi kelab, Datuk Prof Dr. Ahmad Fawzi Mohamad Basri.

Dr Siti Hasmah mengilhamkan penubuhan pusat ini dalam usaha mempertingkatkan kesedaran pengetahuan ilmu teknologi (IT) khususnya bagi masyarakat yang tidak mampu memiliki komputer persendirian.

Bangunan pusat itu bekas pasar lama pekan Jitra diubahsuai dengan kos RM300,000 termasuk pendawaian elektrik dan pemasangan alat pendingin hawa.

Prof Dr Ahmad Fawzi yang juga Timbalan Naib Canselor (Hal Ehwal Pelajar) Universiti Utara Malaysia (UUM) berkata, pusat seumpama itu yang pertama di negara ini dilengkapi dengan 40 unit komputer, bilik kaunseling dan bilik latihan.

Selain menyediakan komputer secara percuma, pusat ini turut mengadakan kelas mengajar komputer, ceramah, teknik menjawab soalan peperiksaan dan latihan kepada anggota masyarakat khususnya anggota Jawatankuasa Kemajuan dan Keselamatan Kampung (JKKK) untuk menyediakan laporan.

Katanya, orang ramai boleh memohon keahlian pusat itu dengan bayaran RM3 sahaja seorang, sekolah menengah (RM300) dan sekolah rendah (RM200).

Pihak Pusat Komputer UUM akan melatih guru-guru komputer, pensyarah dan orang ramai yang berminat menjadi pengajar sukarela kelas komputer di pusat ini, kata Prof Dr. Ahmad Fawzi.

Pusat ini akan beroperasi dari pukul 9 pagi hingga 9 malam.

-- BERNAMA

ZA FAZ